



BOSNIAKISKA ISLAMISKA SAMFUNDET
ISLAMSKA ZAJEDNICA BOŠNJAKA U ŠVEDSKOJ

BILTEN

BR. 35

Informativne novine IZB u Švedskoj

Novembar 2017.



EDUKATIVNI SEMINAR ZA IMAME IZB U ŠVEDSKOJ

„Imamska misija, vjerski radikalizam i nasilni
ekstremizam“

SEKRETARIJAT

email: kontakt@izb.se
tel. 0520-49 90 64
mob.0763-10 2 447

Adresa:
BIS, Åkerssjövägen 10
461 53 Trollhättan
Radno vrijeme:
Radnim danom od 08:00
do 16:30m

PG: 73 88 14-3

www.izb.se
Potražite nas i na facebook-u
Islamska zajednica Bošnjaka u
Švedskoj



Mjesec rebiu-l-evvel je mjesec u kojem je rođen Muhamed, a.s. I dok obilježavamo ovaj značajni događaj, ne možemo se oteti dojmu da je ovo obilježavanje ostalo u sjeni jednog drugog događaja. Radi se haškim presudama, koje su objavljene ovih dana.



Naravno, ne želimo marginalizirati značaj presuda, još manje doljevati so na ranu žrtava genocida i udruženog zločinačkog pothvata, međutim, Muhamed, a.s., bi morao zauzimati neuporedivo više prostora u našem govoru, pisanju i razmišljanju.

Možda bi se ovim povodom bilo dobro podsjetiti na jedan interesantan događaj iz naših krajeva. U sufijskim krugovima u Sarajevu prenosi se da je nekoč jedan čovjek odlučio da klanja 40 nafila kao murad da bi sreo hazreti Hidra i na taj se način okoristio mudrošću koju je posjedovao h. Hidr. Kad je četrdeseto jutro izašao iz svog doma sreo je jednog šejha bijele brade, sa ahmedijom na glavi i u zelenoj džubi. Šejh mu nazva selam i upita kud je krenuo tako rano. Čovjek mu objasni da je završio 40 nafila i krenuo ne bi li sreo h. Hidra. Šejh ga onda upita kako će poznati h. Hidra, na šta se čovjek zbuni i reče da ne zna.

„A hoćeš li da ti ja objasnim kako h. Hidr izgleda?“ – predloži dalje šejh. Čovjek pristade, a onda mu šejh reče. „H. Hidr je stariji insan, bijele brade, na glavi uvijek nosi ahmediju, a ogrnut je u zelenu džubu.“ Čovjek se zahvali, poselami šejha i nastavi dalje, ne iskoristivši (ne znajući) priliku da šta upita šejha (h. Hidra)...

Dragi Bože, osnaži nam vjeru i podari što više mudrosti u ovim teškim vremenima!

Idriz-ef. Karaman

Seminar

Održan seminar za imame

Aktuelnosti

Obilježen Dan državnosti BiH

Mevlud

Mevlud u Örebro i ispraćaj imama u penziju

Mišljenja

Suočavanje s prošlošću i pitanje krivice

Komentar

Reisu-l-ulema nakon presude Mladiću

Hutba

Selam tebi, o milosti svim svjetovima!



imam.ba

Održan seminar za imame

U gradu Gislaved 6. i 7. novembra 2017. godine održan je seminar za imame Islamske zajednice Bošnjaka u Švedskoj pod nazivom: "Imamska misija, vjerski radikalizam i nasilni ekstremizam", uz potporu NBV-a i općine Kungsbacka.



Seminar je organizovan s ciljem edukacije, podrške i jačanja misije imama, te suzbijanja utjecaja interpretacije vjere i vjerskih propisa koji su strani našem tradicionalnom učenju i prakticiranju.

Prvi dan podnesena su četiri referata.

Nakon uvodne i pozdravne riječi imamima prvim referatom obratio se hfz.dr.Mevludin-ef. Dizdarević koji je govorio na temu "Ko i kako govori u ime islama?".

Drugo predavanje je održala Mevludina Abazović, službenica općine Kungsbacka, zadužena za poslove suzbijanja nasilnog ekstremizma.

Mevludina je u okviru svojih redovnih aktivnosti saradnje sa civilnim društvom službeno prisustvovala seminaru imama i govorila na temu „Nasilni ekstremizam i vjerski radikalizam u Švedskoj.“

Ovom prilikom prezentirala je imamima navedenu problematiku u Švedskoj i na koji način država kroz lokalne zajednice djeluje kako bi suzbijala nasilni ekstremizam i vjerski radikalizam i koja su to očekivanja od lokalnih zajednica, prvenstveno vjerskih službenika.

Nakon izvanredne diskusije, skupu se ponovo obratio hfz.dr.Mevludin-ef. na temu „Vjerski radikalizam i nasilni ekstremizam – uzroci i posljedice tekfir ideologije“.

Podjeljeni u četiri grupe imami su razgovarali o tri aktuelne situacije i razmjenjivali iskustva na koji način bi trebali reagovati. Razgovarano je kako i sa kojim institucijama je potrebno sarađivati, kako postupati ukoliko se pojavi interpretacija vjere i prakse koji su strani našem tradicionalnom učenju, te važnosti rada sa omladinom.

Tema referata Smaje-ef. Šahata, imama u džematu Skövde bila je "Poziv imama u Švedskoj i izazovi vremena."

Nakon večere i jacije-namaza hfz.dr.Mevludin-ef. se obratio džematlijama džemata Gislaved.

Drugi dan podnesena su dva referata.

Hfz.dr.Mevludin-ef. je govorio na temu „Bosanski islam kao uzorni model evropskom islamu – fenomenologija bosanskog islama“, a Mustafa-ef. Šetkić, imam u džematu Štokholm govorio je na temu "Vjerske slobode i način organizovanja muslimana u Švedskoj, perspektive za budućnost".

Nakon referata razvila se zaista izvanredna diskusija i osvrta na organizovani seminar te formulirani zaključci:

Preko Savjeta glavnog imama objaviti proglas imama o stavu prema nasilnom ekstremizmu i vjerskom radikalizmu, te navedenu izjavu usvojiti i na Skupštini IZBUŠ.



Svaki imam se treba na lokalnom nivou angažovati i sarađivati sa općinom. Na saveznom nivou nastaviti uspješnu saradnju sa državnim institucijama.

Savjet glavnog imama će pripremiti pristupnicu i proslijediti Izvršnom odboru IZBUŠ i kandidacionoj komisiji. Pristupnicom će se svi kandidati za organe u našoj Zajednici, na saveznom i lokalnom nivou obavezati da će poštovati principe utemeljenja naše Zajednice, na Kur'anu i sunnetu, islamskoj tradiciji Bošnjaka i zahtjevima vremena. Te potvrditi da u svom tumačenju i izvršavanju ibadetskih islamskih dužnosti primjenjuju maturidijski akaid i hanefijski mezheb.

U Zajednici je potrebno formirati radne grupe koje će raditi na duži mandatni period. Grupe će analizirati i usavršavati mektepske udžbenike, rad sa omladinom, medijsko oglašavanje u Zajednici i druge projekte od interesa za Zajednicu.

Preporučuje se svim imamima i džematima da koriste prilike dodatne edukacije koje organizuje SST.

Na kraju seminara imami su spomenuli nedavno penzionisanog imama Hazim-ef. Gurdu, te pohvalili njegov dugogodišnji rad u Islamskoj zajednici i zahvalili se na dugogodišnjoj saradnji.

Da još kažemo, prvi dan seminara održana je Skupština Udruženja ilmije IZBUŠ. Za predsjednika je ponovo izabran Nezir-ef. Špiodić, a u Upravni odbor: Alen-ef. Delić, Hasan-ef. Jašarević, Hamza-ef. Terzić i Benjamin-ef. Dučić.

Seminaru su prisustvovali pored odličnih gostiju predavača 21 imam IZBUŠ-a iz 19 džemata u Švedskoj.

Odličan domaćin ovog dvodnevnog skupa bio je Džemat Gislaved.

A.S.

Obilježen Dan državnosti BiH



Svečani program otpočeo je intonacijom švedske i bosansko-hercegovačke himne, nakon čega je moderator manifestacije Fikret Tufek pozdravio prisutne i istakao historijsku važnost 25. novembra 1943. godine, kada je održano prvo zasjedanje ZAVNOBIH (Zemaljsko anti-fašističko vijeće narodnog oslobođenja Bosne i Hercegovine) u Mrkonjić Gradu. Podsjetio je da je na pomenutom zasjedanju donesena odluka o obnovi državnosti BiH, potvrđene su njene historijske granice, koje datiraju još iz vremena srednjovjekovne Bosne, te je Bosna i Hercegovina definisana kao jedna od šest ravnopravnih republika u

U subotu, 25. novembra, u Alvesti je svečanim sportsko-kulturnim programom obilježen Dan državnosti Bosne i Hercegovine.

Manifestaciju obilježavanja Dana državnosti organiziralo je nekoliko bosansko-hercegovačkih nevladinih organizacija, među kojima i Islamska zajednica Bošnjaka u Švedskoj i njen džemat Växjö koji su za ovu priliku postavili reklamni štand sa informativnim materijalom o radu i aktivnostima koje provode.

U okviru Manifestacije upriličena je i izložba ručnih radova, slika i fotografija od strane nekoliko pojedinaca i organizacija, među kojima je bio veliki broj fotografija stradanja Bošnjaka iz posljednje agresije na Bosnu i Hercegovinu. U okviru sportskog programa održan je turnir u malom fudbalu pod nazivom „Ne, rasizmu“.

tadašnjoj Jugoslaviji.

Prisutnima su se prigodnim govorom, između ostalih, obratili g. Ramiz Salkić, potpredsjednik BH entiteta Republika Srpska i g. Emir Poljo, bivši ambasador Bosne i Hercegovine u Norveškoj. Oba ova govornika naglasili su važnost održavanja ovakvih manifestacija, te pozvali prisutne da se uključe u realizaciju Projekta „Online“ čiji je cilj umrežavanje, odnosno stvaranja mreže Bošnjaka svijeta.

Manifestaciju je uljepšao hor ilahija i kasida džemata Malmö izvedbom nekoliko predivnih ilahija i kasida.

D.J.

Mevlud u Örebro i ispraćaj imama u penziju



U subotu 2. decembra, upriličena je manifestacija ispraćaja u zasluženu penziju dosadašnjeg imama Hazim-ef. Gurde i imenovanje novog imama mr. Mesud-ef. Muhića.

Naime, u džematu Örebro je došlo do prirodne smjene imama jer je imam ovog džemata Hazim-ef. Gurda, zaključno sa oktobrom mjesecom završio svoj dugogodišnji radni vijek i otišao u zasluženu penziju, a na upražnjeno mjesto džemat je zaposlio novog imama, Mesud-ef.

Da bi ovaj događaj obilježili na dostojanstven način Izvršni odbor džemata je organizovao prigodnu manifestaciju. Tim povodom, u džematu je boravio kao gost izaslanik Reisu-l-uleme, Mensur-ef. Pašalić, šef Odjela za dijasporu Rijaseta Islamske zajednice u Bosni i Hercegovini. Manifestaciji su ispred Islamske zajednice Bošnjaka u Švedskoj prisustvovali predsjednik Zajednice Sakib Kenjar, član IO Mirsad Bektešević i Mustafa-ef. Šetkić. Manifestaciju su svojim prisustvom uveličali imami Mubin-ef. Neimarlija iz džemata Norrköping, Alija-ef. Mustafić iz džemata Motala, Meris-ef. Mustafić te brojne džematlije.

Manifestacija je započela klanjanjem podne-namaza. Poslije namaza prisutni imami su učenjem ilahija i kasida popunili vrijeme do ikindije-namaza. U to vrijeme se skupu obratio predsjednik Islamske zajednice Bošnjaka u Švedskoj, Sakib Kenjar, koji je u svom obraćanju

gostima i džematlijama pohvalio dugogodišnji rad Hazim-ef. Gurde. Zatim je spomenuo izgradnju objekta budućeg islamskog centra te potrebu da se svi angažujemo da se taj projekat, uz Allahovu pomoć, što prije završi.

Poslije ikindije-namaza proučen je mevlud. Zatim se gostima obratio Mensur-ef. Pašalić koji je tom prilikom uručio zahvalnicu Hazim-ef. Gurdi za njegov dugogodišnji rad u Islamskoj zajednici, a potom je uručio Mesud-ef. Muhiću dekret o postavljanju na mjestu imama.

Hazim-ef. Gurda je sa suzama u očima napravio kratak rezime svog životnog puta i angažmana u džematu Örebro. Novi imam, Mesud-ef. Muhić se zahvalio na ukazanom povjerenju koje će, uz Allahovu pomoć, nastojati opravdati svojim radom.

Na samom kraju uslijedile su čestitke novom i starom imamu, a zatim su svi prisutni pozvani na zajednički ručak u prostorijama džemata koji su pripremile vrijedne džematlije i džematlije ovog džemata.

Sakib Kenjar



Suočavanje s prošlošću i pitanje krivice

Presude nisu gotovo nikako satisfakcija za žrtve Genocida i udruženog zločinačkog poduhvata, ali za budućnost regiona najvažnije je kako se one doživljavaju u srbijanskom i hrvatskom društvu. Ključno je pitanje koliko su ova društva spremna da se suoče s istinom o zločinima, odnosno koliko se Srba u slučaju presude Mladiću ili Hrvata u slučaju „Prlić i ostali“ identificira s osuđenim ratnim zločincima. Krivična odgovornost za počinjene zločine je na pojedincima, ali moralna i politička odgovornost je na društvu.

Međunarodni krivični sud za bivšu Jugoslaviju je nakon izrečene drugostepene presude u slučaju 'Prlić i ostali' 29. novembra, formalno, završio svoj rad. Sedam dana ranije na ovom Sudu izrečena je presuda i 'kasapinu iz Bosne', Ratku Mladiću.

Vodeći srpski i hrvatski političari u BiH, ali i oni u susjednim državama Srbiji i Hrvatskoj iskoristili su ove presude ratnim zločincima – a, to se sada čini najproblematičnijim - za politizaciju presuda i nametanje krivice za zločine naroda kojima pripadaju. Čuli smo kako nakon presuda prigovaraju da je riječ o političkom sudu. I vrlo je moguće da jeste, ali to se najviše ogleda u tome da je Sud podlegao pritiscima i izbjegao izreći presudu za genocid u šest bosanskohercegovačkih općina: Ključ, Kotor-Varoš, Sanski Most, Prijedor, Vlasenica i Foča.

I pored toga, ove presude su historijske i značajne za sve, a njihov značaj je i u tome što su postale izvor za buduća naučna istraživanja o temama genocida i zločina protiv čovječnosti. Presude nisu gotovo nikako satisfakcija za žrtve Genocida i udruženog zločinačkog poduhvata, ali za budućnost regiona najvažnije je kako se one doživljavaju u srbijanskom i hrvatskom društvu. Ključno je pitanje koliko su ova društva spremna da se suoče s istinom o zločinima, odnosno koliko se Srba u slučaju presude Mladiću ili Hrvata u slučaju „Prlić i ostali“ identificira s osuđenim ratnim zločincima. Krivična odgovornost za počinjene zločine je na pojedincima, ali moralna i politička odgovornost je na društvu. U tom smislu, za pomirenje je potrebno da se dogodi mnogo toga, ali je važno i to da se razgovara i sa onima za koje je Ratko Mladić ili bilo koji drugi ratni zločinac heroj. To zvuči paradoksalno, ali može biti razumljivo u jednostavnoj istinitosti koja je došla do izraza u gesti onog roditelja, koju su zabilježile televizijske kamere na samom početku rata, kada otac noseći u naručju snajperom ranjeno dijete u opkoljenom Sarajevu kaže: „Volio bih kafu popiti s tim čovjekom, da vidim šta je mislio i šta je htio.“



Koliko je to važno, kao dio procesa suočavanja s prošlošću, razumljivo je, takođe, i iz pitanja koja je banjalučki psiholog Srđan Puhalo ovih dana postavio onima koji ratne zločince vide herojima: 'A šta je tu herojsko? Je li herojski pobiti 102 djeteta u Prijedoru? Je li herojski kada napraviš masovnu grobnicu veliku kao pola fudbalskog igrališta? Je li herojski kada u Foči otvoriš javnu kuću i siluješ dojučerašnje komšinice? Je li herojski kada natrpaš u Višegradu punu Aljića kuću sa 65 civila i zapališ ih? Je li herojstvo kada sve ovo znaš i čutiš o tome? Je li herojski zločine pojedinca pripisivati čitavom narodu?' i td.

Razgovarati s jedne strane, a s druge ohrabrivati one slojeve naših društava koji nas kao, naprimjer, „Žene u crnom“ već dvadeset godina herojski suočavaju s istinom o Genocidu i zločinima počinjenim na našim prostorima i pokazuju da je takvo suočavanje potrebno i moguće. Krivičnu odgovornost nakon presuda moraju preuzeti oni koji su osuđeni za Genocid, udružene zločinačke poduhvate i druge počinjene zločine. Društvu ostaje moralna odgovornost kojoj treba prethoditi osuda zločina i zločinačkih djela onih pojedinaca iz naših naroda koji su ta djela počinili. Nijedan narod nije potpuno oslobođen onih koji jesu ili bi činili zločine. Ovdje, ilustracije radi, podsjećam na rezoluciju koju je Udruženje El-Hidaje usvojilo na Skupštini održanoj u Sarajevu 14.08.1941. u kojoj između ostalog stoji: „Osuđujemo sve one pojedince muslimane koji su na svoju ruku sa svoje strane eventualno napravili kakav bilo ispad i učinili kakvo nasilje. Konstatiramo da su tako što mogli učiniti samo neodgovorni elementi i neodgojeni pojedinci, čiju ljagu odbijamo od sebe i od svih muslimana. Pozivamo sve muslimane da u duhu visokih uputa svoje vjere islama i u interesu države, strogo klone svakog zlodjela“.



Sa bošnjačke strane, slične formulacije odricanja od zločinaca mogli smo čuti u posljednjih dvadeset godina. Tačno je da je bilo takvih glasova i kod pripadnika drugih naroda – i oni su, u ovdašnjem političkom i društvenom kontekstu, herojski - ostaje ipak, pitanje da li ih se čuje i postoji li spremnost za prihvatanje istine?

A za pomirenje je potrebna i katarza. Ukoliko je ne bude, osim bosanskohercegovačkom društvu, oni koji nisu spremni na odvažno suočavanje sa zločinima iz prošlosti predstavljat će teret i veliku opasnost za budućnost Evrope. Problem 'politizacije' presuda stoga neće biti samo problem Bosne i Hercegovine i regiona, nego i Evropske unije.

Senada Tahirović

(www.preporod.com)

Reisu-l-ulema nakon presude Mladiću: Sada je najbitnije da se okrenemo budućnosti



Reisu-l-ulema Husein-ef. Kavazović je komentirao za Preporod presudu zločincu Ratku Mladiću, koja je danas izrečena s mjerom doživotne kazne zatvora.

“Ovo je prilika da se svi, a posebno srbijansko društvo i zvaničnici među bosanskim Srbima suoče s prošlošću. Jedino istina o onome što se ovdje dešavalo može biti osnova za povratak pomirenja. Ova presuda će dobiti dodatno na važnosti ako doprinese procesu pomirenju. Taj proces će biti nemoguć, ako se nastavi s glorificiranjem zločinaca i politika koje su rezultirale zločinom. Žao nam je što Sud nije prihvatio dokaze da je i u drugim općinama pored Srebrenice počinjen genocid. Mi, i ljudi koji su to preživjeli, znaju razmjere zločina. Sada

je najbitnije da se okrenemo budućnosti i da se svi distanciramo od onih za koje je pred najvišim sudskim instancama dokazano da su učestvovali u organiziranim zločinačkim poduhvatima i da to učimo svoju djecu. Da ne ponavljamo greške iz prošlosti i da stanemo na stranu žrtava“, kazao je u svom komentaru na presudu reisu-l-ulema Husein Kavazović.



Slijedimo li običaje drugih naroda?

Muhamed a.s. rekao: “oponašat ćete običaje i praksu prijašnjih naroda pedalj po pedalj, lakat po lakat, pa kad bi u gušterovu rupu ušli – otišli bi za njima. Upitan je Poslanik: “jesu li to kršćani i jevreji – pa ko drugi”, odgovori Poslanik.”



Djeda mraz - simbol je biskupa Svetog Nikole iz 4.vijeka. Kao djeda mraz obilježava se od 1823.g. umjesto Svetog Nikole. Već duži niz godina kroz različite sisteme pokušava se nametnuti kao simbol koji će djecu obradovati sa poklonima.



Jelke (božićna drvcad) – je također jedan od simbola dočeka Božića, prvi put jelka je postavljena u jednoj Njemačkoj katedrali. U srednjem vijeku u evropskim crkvama organizovana je predstava o raju (džennetu) u kojem je postavljano drvo na koje su se kitile jabuke, a poslije i drugo voće kao sjećanje na prvi grijeh koji su počinili Adam i Eva (Adem a.s. i Hava). Vremenom se to mijenjalo da bi danas došlo do ukrašenih jelkih, plastičnih loptica, svjetiljki itd.



Paljenje svijeća – je također jedan od simbola Božića koji potječe iz 1838.g. iz doma za siromašnu djecu “Trošna kuća” u Hamburgu. Pastor Johan da bi učinio djeci siromašnoj zanimljive trenutke dočeka Božića on bi svaki dan s njima palio po jednu svijeću.

Santa Lucia – je pjesma napisana u Italiji 1849.g., koja simboliše djevojku koja je imala obilježja svjetla iznad glave. Danas postoji više verzija ove pjesme i gotovo svako naše dijete poznaje tu pjesmu kroz vrtiće ili škole, inače se obilježava 13.12. također kao jedan od simbola božićnih praznika.



Slavljenje Božića – riječ Božić nastao je od riječi umanjenog značenja riječi Bog, što označava da se rodio tzv. “mali bog”. Inače Božić simboliše rođenje Isusa (Isa a.s.). U Novom zavjetu ne piše kada je

rođen Isus (Isa a.s.), a čak ni prvi kršćani ga nisu obilježavali. Tek se počeo obilježavati u 4 st. Među crkvama postoji neslaganje kada je rođen Isa a.s. i nije poznato zašto se obilježava 25.12. Prema nekim izvorima prevladava mišljenje da se tog datuma obilježavalo u pagansko doba rođenje boga sunca, pa je crkva željela da potisne taj blagdan i obilježava dan rođenja Isusa (Isa a.s.).

Nova godina - Po nekim kazivanjima prvi koji su slavili su bili Kinezi, po drugim su to bili stari Germani ili Rimljani. Stari Germani su slavljem obilježavali smjenu godišnjih doba. Kako zima u njihovim zemljama počinje sredinom novembra kada se završava žetva, okupljali su se i veselili zbog obavljene žetve i predstojećeg odmora. Tako je, kažu, nastao veliki praznik: početak Nove Godine. Nakon osvajanja Evrope, Rimljani su promijenili početak slavljenja nove godine na prvi januar. Novu godinu su slavili kao simbol početka novog života i novih nada za budućnost. Taj običaj i značenje zadržali su se do današnjih dana. Rusi su sve do 10. stoljeća slavili Novu godinu 1. marta, kao dolazak proljeća. Slavili su u čast Sunca a njihovi obredi su imali magijsko značenje.

Muhamed a.s. je rekao: “Ko oponaša neki narod, on je od njih”

Muslimansko-evropsko vijeće odobrava čestitanje praznika, ali ne i učestvovanje u obredima i molitvi. Čestitanje u cilju socijalnog, međureligijskog i komšijskog suživota je dozvoljeno. Također, nije zabranjeno prisustvovanje večerama povodom praznika, razmjenjivanje darova ali jeste učestvovanje u molitvi. Posjeta crkvi u cilju razgledanja njene unutrašnjosti nije zabranjena, ali učestvovanje u molitvi jeste muslimanima zabranjeno.

Pravo svakog pojedinca i porodice je da po svojoj vlastitoj svijesti prihvati ili ne prihvati spomenute simbole. Ali je po islamskom učenju svako odgovoran za vlastiti izbor. “Svaki je čovjek odgovoran za ono što je uradio” (Kur'an), zatim Muhamed a.s. kaže: “Svako je od vas pastir svoga stada i biće odgovoran za njega!”

Hutba: "Selam tebi, o milosti svim svjetovima"

Hatib: Nezir-ef. Špiodić

Hvala Allahu, dž.š., Gospodaru svega. Neka su salavat i selam na Poslanika Muhammeda, a.s, njegovu časnu porodicu, ashabe, šehide i sve sljedbenike dini-islama.

Draga braćo,

Izgovorimo li ime mjeseca Muharrema podsjetit će nas na hidžru i njene poruke. Redžeb će nas podsjetiti na noć želja i Mi'radžsku noć. Ša'ban na Lejletul-berat. Ramazan nas podsjeća na post. Ševval i Zul Hidždže nas obraduju bajramima, a mjesec u kojem se sad nalazimo, mjesec Rebiul-evvel nam donosi radost intenzivnijeg sjećanja na rođenje i život posljednjeg Allahovog poslanika!



Jer, u ovom mjesecu Rebiul-evvelu 570. godine, u gradu Mekki, majka Amina rodila je plemenitog dječaka koji će cijelom čovječanstvu donijeti milost, uputu, spas, svjetlo, nadu. To je bio dan radosti i Božijeg dara ljudima. Kao što kaza jedan mevludski stih: Selam alejk' Miljeniče, merhaba; Ljepšeg dara ljudskom rodu ne treba!

Kada bi u najkraćem opisivali taj dar Božiji nama, našeg Poslanika Muhammeda (a.s.), mogli bi smo kazati da je bio uživanje za svako čulo. Oko kada bi ga gledalo uživalo je. Uho kada bi ga slušalo uživalo je. Nos kada bi osjetio njegov miris uživalo je. Ruka koja bi ga dohvatila uživala je.

Poslanika Muhammeda, a.s., krasile su najljepše moralne osobine, a danas ćemo izdvojiti jednu od njih koja nam najbolje oslikava ličnost našeg Poslanika i pojašnjava čime i kako je Poslanik a.s., osvajao ljudska srca. Našeg Poslanika je krasila pravednost, iskrenost, strpljivost, suosjećajnost, ljubav, blagost, ali prije svega milost. Milost je bila suština njegovog života. On je bio poslanik milosti; u svakoj njegovoj riječi, u svakom postupku, osmijehu ili ljutnji, nalazila se ljepota milosti.

Gospodar je za njega u Kur'anu kazao: "وَمَا أَرْسَلْنَاكَ إِلَّا رَحْمَةً لِّلْعَالَمِينَ" Mi smo te (Muhammede) poslali samo kao milost svim svjetovima!"

Njegov život je bio milost, ona milost koja je danas potrebna čovječanstvu. Milost koja je uvijek, pa i danas potrebna porodicama, prijateljima, zajednicama.

Milost je najveća odlika Poslanika (a.s), ali i glavno obilježje čitave vjere islama. Naš Gospodar je otvorio svemir milošću. Stvorio je Adema sa milošću. Započeo je Kur'an sa milošću. Taberani bilježi hadis, u kome je Allahov Poslanik, a.s., rekao: "Niko od vas neće ući u Džennet, osim Allahovom milošću." Prisutni upitaše: "Zar ni ti, Allahov Poslaniče?" "Ni ja, ako me Allah ne obaspe Svojom Milošću!" - reče Poslanik, alejhi selam.



Jednog dana Poslaniku dovedeše čovjeka koji se pio alkohol. Kad ga ugledaše, njegovi drugovi povikaše: "Allah ga prokleo, često ga dovode pijanog." A Poslanik će na to: "Nemojte ga proklinjati! Tako mi Allaha, ono što ja znam (o njemu) jeste da on voli Allaha i Njegovog Poslanika!" (Buhari)

Koliko je Muhammed svijetla ličnost! On ne ruši sudbine ljudi zbog slabosti koje su prisutne u njima, već gleda njihove dobre strane i to hvali, tako ih podstiče na dobro i čuva njihov ugled među drugim ljudima. Trudio se da ni jednim svojim gestom i postupkom ne uznemirava bilo koga!

Poslanik (a.s.) je i nas često spominjao. Nas što živimo u ovom vremenu. Jedne prilike pred svoju smrt Poslanik (a.s.) se rasplakao. Upitali su ga: -"Šta te rasplaka, o Allahov Poslaniče?" -"Poželio sam braću svoju", odgovorio je. Rekoše: -"Zar mi nismo tvoja braća?" On odgovori: - "Ne, vi ste moji drugovi, a moja braća su ljudi koji će doći poslije mene, i vjerovat će u mene, iako me neće vidjeti."

Živio je prije 1400 godina, a mislio je na tebe i mene, na našu djecu, na mog i tvog oca, na tvoju i moju majku... Nikada nije zaboravljao na nas.

Ja Resulallah, umirao si, a na nas si mislio! Ja Nebijjallah, ispuštao si dušu, a tvoje riječi su bile Moj ummet, moj ummet! Ja Habiballah, na miradžu, Gospodar Nebesa i Zemlje te upitao: O Muhammede, reci šta želiš? A ti ne reče: Daj meni što više, daj mojoj porodici, uživim prijateljima, nego kažeš: Gospodaru, moj ummet, moj ummet!

Braćo,

Nakon svih ovih primjera, koji u samo kap u okeanu Poslaničkog života, zamolit ću i i vas - nemojmo sebi dozvoliti da mjesec rebiul-evvel koji je pred nama prođe nam, a da u tom mjesecu ne preispitamo svoj odnos prema našem Poslaniku.

Većina muslimana danas ovaj radosni mjesec dočekuje programima, salavatima, mevludima... Uvedimo i mi intenzivnije Poslanika u svoj život. Često ga se sjećajmo salavatom, odvojimo vremena da poslušamo koje predavanje o njegovom životu, trudimo se pročitati nešto iz njegove biografije. A pogotovo se potrudimo da svoj život uljepšamo njegovim savjetima i njegovom praksom.

On (a.s.) nam je kazao: 'Bit ćete na Sudnjem danu s onima koje ste voljeli!' Jedan Poslanikov prijatelj Enes, (r.a.) kaže: „Nismo se ničemu toliko obradovali kao riječima: „Ti ćeš biti sa onima koje voliš!“ Zatim reče: "Ja zaista volim Poslanika i Ebu Bekra, i Omera... Nadam se da ću biti sa njima zbog moje ljubavi prema njima, pa makar i neraspolagao sa sličnim djelima koja su oni činili!" (Buhari)

Braćo, dovim Allahu da ova hutba i džuma namaz probudi u nama još veću ljubav prema našem Poslaniku.

Molim Gospodara da nam pomogne da Poslanik bude s nama u našim životima i praksi na Ovom svijetu, a mi zajedno s njim u vječnom Džennetu! Amin!



BILTEN



imam_{ba}

ISLAMSKI PORTAL ZA SVE VAS!

www.imam.ba

Poziv svršenicima i svršenicama medresa koji žive u Švedskoj

Islamska zajednica Bošnjaka u Švedskoj priprema bazu podataka imama i muallima, koji bi mogli i željeli mijenjati naše aktivne imame na džuma namazima, vjerskoj pouci i drugim obavezama, za vrijeme godišnjih odmora i drugim prilikama.

Stoga, pozivamo sve svršenike i svršenice medresa, koji žive u Švedskoj a nisu angažirani u nekom od naših džemata, da se jave glavnom imamu Idriz-ef. Karamanu, na mejl adresu: idrizekaraman@hotmail.com

POZIV NA SARADNJU

Oglasite se i Vi u Biltenu IZB u Švedskoj!

Javite nam se sa vašim tekstom, prijedlogom, primjedbom i sugestijom.

e-mail: bilten@izb.se

BILTEN

Informativne novine

**Islamske zajednice
Bošnjaka u Švedskoj**

GLAVNI UREDNIK

Idriz-ef. Karaman
glavni imam

IZVRŠNI UREDNIK

Almedin-ef. Spahić

REDAKCIJA:

Savjet glavnog imama:
Hasan-ef. Jašarević
Fuad-ef. Čolić
Elvedin-ef. Bešlija

SARADNICI:

Jasmin Dervišević
Sakib Kenjar

Stari brojevi/arhiva:

[www.izb.se/index.php/
bilten](http://www.izb.se/index.php/bilten)

Bemuf

www.bemuf.org